

BOSNA I HERCEGOVINA
FEDERACIJA BOSNE I HERCEGOVINE
GENDER CENTAR FEDERACIJE BOSNE I HERCEGOVINE

**IZVJEŠTAJ O PROVOĐENJU STRATEŠKOG PLANA ZA
PREVENCIJU NASILJA U PORODICI ZA FEDERACIJU BOSNE I
HERCEGOVINE – 2009 - 2010**

za period 01.01.-30.06.2009.godine

Sarajevo, juli 2009. godine

1. Uvodne napomene

Vlada Federacije Bosne i Hercegovine je na svojoj 77. sjednici održanoj 13.11.2008. godine usvojila **Strateški plan za prevenciju nasilja u porodici za Federaciju Bosne i Hercegovine – 2009-2010 godine** („Službene novine Federacije BiH”, br. 77/08), u daljnjem tekstu: Strateški plan.

Ovim strateškim dokumentom utvrđene su aktivnosti nadležnih subjekata s područja Federacije Bosne i Hercegovine koje je potrebno realizirati u 2009. i 2010. godini¹. Realizacija planiranih aktivnosti ima za cilj stvaranje uvjeta za multidisciplinarni pristup rješavanju problema nasilja u porodici. Tačkom 9. ovog strateškog plana utvrđena je obaveza Gender Centra Federacije Bosne i Hercegovine da koordinira rad na provođenju ovog strateškog plana, i svakih šest mjeseci podnosi izvještaj Vladi Federacije Bosne i Hercegovine o provođenju aktivnosti sadržanih u Strateškom planu.

U vezi s tim Gender Centar Federacije Bosne i Hercegovine je početkom 2009. godine zatražio od svih subjekata da pristupe realizaciji svojih aktivnosti utvrđenih u Strateškom planu i da osiguraju potrebna sredstva za njihovu realizaciju. Gender Centar Federacije Bosne i Hercegovine je također učestvovao u izradi projekta UNFPA (United Nations Population Fund) kojim će se osigurati donatorska sredstva za realizaciju izrade multidisciplinarnog pristupa rješavanju problema nasilja na lokalnom nivou. Prema saznanjima Gender Centra Federacije Bosne i Hercegovine ova sredstva će biti operativna u septembru mjesecu ove godine.

U pripremi ovog izvještaja zatraženi su podaci od svih nosilaca aktivnosti na federalnom nivou o stepenu realizacije pojedinih aktivnosti i eventualnim problemima koji su se pojavili u toku provođenja dijelova Strateškog plana.

Osnovni problem u provedbi Strateškog plana je nedostatak budžetskih sredstava potrebnih za provođenje pojedinih aktivnosti, a naročito za izradu programa obuke profesionalaca koji se bave problemima nasilja, odnosno koji rade sa žrtvama nasilja i nasilnim osobama. I pored nedovoljnih sredstava evidentni su naponi svih subjekata na realizaciji utvrđenih aktivnosti.

¹ Parlamentarna skupština Bosne i Hercegovine usvojila je Strategiju za prevenciju i borbu protiv nasilja u porodici za period 2009-2011. godina („Službeni glasnik BiH”, br. 50/09) koja sadrži sve aktivnosti iz Strateškog plana za prevenciju nasilja u porodici za Federaciju BiH – 2009-2010.

2. Realizirane aktivnosti

2.1. Zakonodavna aktivnost

U skladu s rokovima utvrđenim Strateškim planom, u izvještajnom periodu pokrenute su aktivnosti na izmjenama i dopunama Krivičnog zakona Federacije Bosne i Hercegovine, kao i Zakona o zdravstvenoj zaštiti i Zakona o zdravstvenom osiguranju čiji je cilj bolja zaštita žrtve nasilja. Tako su Zakonom o zdravstvenom osiguranju („Službene novine Federacije Bosne i Hercegovine”, br. 70/08) zdravstvenim osiguranjem obuhvaćena sva djeca od početka pa do kraja školovanja, a Nacrtom zakona o zdravstvenoj zaštiti, koji se trenutno nalazi u parlamentarnoj proceduri, predviđa se osiguranje zdravstvene zaštite svim žrtvama nasilja u zajednici. U toku je i rad na izmjenama Zakona o zdravstvenom osiguranju kojim će se predvidjeti ostvarivanje zdravstvene zaštite svim žrtvama nasilja u zajednici.

U okviru Centra za edukaciju sudija i tužilaca Federacije Bosne i Hercegovine do kraja 2009. godine bit će održan seminar za sudije i tužioce Federacije Bosne i Hercegovine o temi „Krivična djela protiv braka, porodice i omladine” gdje će se posebno obraditi pitanje hitnosti u procesuiranju i donošenju odluka zbog krivičnog djela nasilja u porodici i prioriteta u radu nadležnih sudova, a i osigurati tretiranje pravosnažno osuđenih osoba, u vezi s krivičnim djelima nasilja u porodici i drugim sličnim krivičnim djelima, na način da ove okolnosti za iste osobe uvijek predstavljaju otežavajuće okolnosti u svim vrstama postupaka (krivični, prekršajni i disciplinski postupak).

Federalni zavod za zapošljavanje je u okviru programa rada za 2009. godinu planirao realizaciju programa „Sufinansiranje zapošljavanja osoba sa invaliditetom i drugih teže zapošljivih grupa nezaposlenih osoba” u kojem su ciljna grupa osobe sa invaliditetom i **žene žrtve nasilja** prijavljene na evidenciju nezaposlenih. S tim u vezi, planirano je sufinansiranje 120 osoba iz ciljne grupe, u trajanju od 12 mjeseci u iznosu od po 700,00 KM mjesečno. Za realizaciju ovog programa planiran je iznos od 1.008.000,00 KM. Također je, u vezi s ovom aktivnošću, Federalno ministarstvo rada i socijalne politike – Sektor za socijalnu zaštitu i zaštitu porodice i djece uputilo odgovarajući akt Sektoru za rad i zapošljavanje tog ministarstva radi njene realizacije.

U okviru aktivnosti na osiguravanju normativnih pretpostavki za bolju i efikasniju zaštitu žrtve nasilja u porodici Strateškim planom su predviđene određene aktivnosti u vezi s izmjenama i dopunama zakona o socijalnoj zaštiti na federalnom i kantonalnom nivou u smislu da se žrtve nasilja definiraju kao kategorija korisnika prava socijalne zaštite. S tim u vezi, Federalno ministarstvo rada i socijalne politike ističe da je u toku reforma socijalnog sektora i da će se u okviru izrade novih propisa voditi računa o smjernicama i preporukama koje je ratificirala Bosna i Hercegovina.

2.2. Izrada programa obuke profesionalaca (nastavnog osoblja, zdravstvenih radnika, policije, centara za socijalni rad, nosilaca pravosudnih funkcija)

Ovim strateškim planom predviđeno je da se u prvih šest mjeseci provođenja Plana pokrenu aktivnosti na izradi određenih programa obuke za osobe koje rade sa žrtvama nasilja, odnosno sa nasilnim osobama, i da se započne s programom obuke. Strateškim planom je također planirano da se u okviru Budžeta Federacije BiH izdvoje sredstva za izradu posebnih programa, a da sredstva za obuke osiguraju institucije gdje profesionalci rade, odnosno iz donatorskih

sredstava. Iako su u okviru svih nadležnih federalnih ministarstava bila planirana sredstva za izradu programa pri usvajanju konačnog teksta Budžeta, u većini ministarstava ta su sredstva raspoređena za neke druge namjene (izuzev Federalnog ministarstva obrazovanja i nauke). Bez obzira na uočene probleme i nedostatak finansijskih sredstava, i u ovom dijelu provođenja Strateškog plana postignuti su određeni rezultati:

a) Aktivnosti federalnih ministarstava

- Federalno ministarstvo obrazovanja i nauke je pokrenulo postupak formiranja radne grupe (sastavljene od predstavnika svih deset kantonalnih ministarstava obrazovanja i pedagoških zavoda), koja treba izraditi programe obuke za nastavno osoblje;

- Federalno ministarstvo zdravstva pokrenulo je aktivnosti na osiguravanju sredstava za izradu programa obuke za zdravstvene radnike, tako da su ta sredstva osigurana i pristupljeno je pripremi programa obuke zdravstvenih radnika²;

- Federalno ministarstvo unutrašnjih poslova izradilo je Akcioni program za implementaciju svojih zadataka utvrđenih Strateškim planom koji uključuju i izradu određenih programa obuka policijskih službenika. U toku su pripreme za izradu programa obuke i izvođenje te obuke za policijsko osoblje u svim kantonima koji rade na pitanjima nasilja u porodici. Pored toga, ovo ministarstvo je dostavilo svim kantonalnim ministarstvima unutrašnjih poslova publikaciju pod nazivom „Policija i nasilje u porodici u Bosni i Hercegovini” kao i niz drugih promotivnih materijala čiji je cilj preventivno djelovanje u suzbijanju pojava nasilja u porodici. Održan je i sastanak s predstavnicima Švicarske agencije za razvoj i saradnju na kojem je izražena spremnost za finansiranje aktivnosti predviđenih Strateškim planom iz oblasti sigurnosti a u vezi sa štampanjem promotivnih materijala;

- Agencija za državnu službu Federacije Bosne i Hercegovine u saradnji sa Federalnim ministarstvom pravde i Gender Centrom Federacije Bosne i Hercegovine izradila je projekat obuke državnih službenika iz oblasti pravosuđa, obrazovanja, zdravstva, sigurnosti, socijalne politike i obratila se Uredu koordinatora za reformu javne uprave za finansiranje projekta. Na sastanku Upravnog odbora prihvaćen je prijedlog projekta te je dogovoreno da obuku o problemu nasilja u porodici, osim državnih službenika iz federalnih i kantonalnih ministarstava, prođu i službenici sa državnog nivoa i iz Brčko Distrikta čime bi obuku prošlo oko 130 osoba. Trenutno se čeka odobrenje finansiranja ovog projektnog prijedloga;

- Iako je Federalno ministarstvo rada i socijalne politike izradilo Akcioni program koji obuhvata sadržaj i sredstva za izradu programa obuke zaposlenih u centrima za socijalni rad koji rade sa žrtvama nasilja i nasilnim osobama, zbog nedostatka sredstava nisu pokrenute aktivnosti na realizaciji tog programa.

b) Aktivnosti drugih federalnih organa

Centar za edukaciju sudija i tužilaca Federacije Bosne i Hercegovine je također posvetio pažnju problematici nasilja kroz svoj Modul 1.-„Nosioци pravosudne funkcije i društvo” u sklopu projekta „Početne obuke” za osobe koje u narednom periodu namjeravaju biti nosioци tužilačke ili sudijske funkcije. Ova obuka predstavlja obaveznu obuku za stručne saradnike, stručne savjetnike i pripravnike u sudovima i tužilaštvima svih nivoa u Federaciji Bosne i Hercegovine.

² Dio sredstava za izradu ovog programa osigurala je Agencija za ravnopravnost spolova Bosne i Hercegovine.

c) Aktivnosti nevladinog sektora u oblasti edukacije

Što se tiče učešća nevladinih organizacija i njihovog rada na provođenju i realizaciji Strateškog plana, Gender Centru Federacije Bosne i Hercegovine svoje izvještaje dostavile su: nevladine organizacije „Žene ženama” Sarajevo, „Caritas” Mostar, „Medica” Zenica, „Fondacija lokalne demokratije” Sarajevo, „Vive Žene” Tuzla, „Žena BiH” Mostar i „Žene sa Une” Bihać. Iz dostavljenih izvještaja vidljivo je da su nevladine organizacije u prvih šest mjeseci ove godine realizirale niz aktivnosti čiji cilj je bio pružanje pravovremene i adekvatne stručne pomoći žrtvama nasilja, nasilnim osobama, kao i niz aktivnosti na uspostavi što čvršćih vidova saradnje s lokalnim i kantonalnim organima vlasti u smislu osiguranja finansijskih sredstava. Također su ove nevladine organizacije pokretale i niz istraživanja čiji je cilj utvrđivanje uzroka nasilja i skretanje pažnje na postojanje ovog problema, a posebno među učenicima/ama i studentima/cama (npr. nevladine organizacije „Žene ženama” Sarajevo i „Medica” Zenica). Nvladine organizacije su također provele niz aktivnosti čiji je cilj bio edukacija. Tako je:

a) Nvladina organizacija „Vive Žene” Tuzla:

- održala seminar za zdravstvene radnike (ljekare, medicinske tehničare i zaposlenike Centra za mentalno zdravlje Tuzla);
- održala seminar za socijalne radnike s područja Tuzlanskog kantona;
- održala seminar za zaposlenike svih policijskih uprava i stanica s područja Tuzlanskog kantona;

b) Nvladina organizacija „Medica” Zenica:

- održala dvomjesečnu edukaciju nastavnog osoblja Osnovne specijalne škole u Zenici vezane za pitanja prevencije nasilja nad djecom i nasilja u partnerskim odnosima, posljedice nasilja u porodici, te posljedice i prevenciju traume;
- izdala publikaciju pod naslovom „Drugi pogled na vrh ledenog brijega” u kojoj su štampani rezultati provedenog istraživanja o spolno baziranom nasilju i nasilju nad djecom, koje je provedeno na uzorku od 600 žena i djevojaka anketiranih na području općine Zenica i 100 žena i djevojaka na području općine Modriča;
- izdala publikaciju pod naslovom „Prekogranična saradnja u sprečavanju nasilja nad ženama i djecom” rađenu u okviru regionalne saradnje te nevladine organizacije sa Autonomnim ženskim centrom Beograd i Centrom za žene rata ROSA Zagreb;

c) Nvladina organizacija „Prihvatilište za žene i djecu u nevolji „MIRJAM” i Porodično savjetovalište u okviru „Caritasa” Mostar:

- organizirala četiri radionice s ciljem edukacije mladih, radionicu za roditelje i osoblje dječijeg vrtića na temu nenasilnog rješavanja sukoba i razvijanja nenasilnog ponašanja;
- organizirala u saradnji sa Rehabilitacijskim centrom za osobe s posebnim potrebama „Sveta obitelj” seminar za radnike koji rade s djecom i odraslima koji rade s djecom s posebnim potrebama;
- organizirala predavanje na temu nasilja u porodici na Ekonomskom fakultetu Sveučilišta u Mostaru koje je bilo otvoreno za javnost i namijenjeno prvenstveno studentskoj populaciji;
- održala predavanje u Elektrotehničkoj školi u Mostaru na temu vršnjačkog nasilja;

d) Nvladina organizacija „Fondacija lokalne demokratije” Sarajevo:

- realizacijom projekta „Jačanje kapaciteta profesionalaca za primjenu Državne strategije za zaštitu djece od nasilja, zlostavljanja i uznemiravanja” omogućeno profesionalcima u oblasti obrazovanja da usvoje vještine neophodne za rad na problemu nasilja nad djecom. Ovaj projekat je takvu mogućnost pružio i zaposlenicima u centrima za socijalni rad i policijskom osoblju;

e) Nevladina organizacija „Žena BiH” Mostar:

- izdala priručnik za profesionalce pod nazivom „Kako prepoznati nasilje nad djecom i pomoći djetetu žrtvi nasilja”. Ovaj priručnik je prvenstveno namijenjen osoblju zaposlenom u obrazovnim i zdravstvenim ustanovama;

f) Nevladina organizacija „Žene sa Une” Bihać:

- realizirala projekat „Borba protiv trafikinga i nasilja nad djevojčicama i majkama” ;
- održala radionicu na osnaživanju žena u političkom životu u općinama Bihać i Bosanski Petrovac;
- aktivno sudjeluje u projektu UNDP-a pod nazivom „Susjedima u budućnost – tranzicijska pravda”;
- razvijaju različite vidove volonterizma među ženama i djevojkama u saradnji sa OSCE-om.

Značajno je istaći da su za sve prethodne aktivnosti nevladine organizacije osigurale sredstva putem određenih međunarodnih donatora.

2.3. Razvijanje jedinstvenog multidisciplinarnog modela postupanja u prevenciji i zaštiti od nasilja u porodici i međusobna saradnja svih subjekata u prevenciji nasilja u porodici i u procesu zaštite žrtve nasilja

Inicijatori za realizaciju ovog dijela Strateškog plana su u prethodnih šest mjeseci bile nevladine organizacije koje djeluju na području Federacije Bosne i Hercegovine i u okviru svog mandata se bave pitanjima nasilja u porodici. Realizacija aktivnosti koje su predviđene u okviru ovog dijela Strateškog plana ima za cilj da se u svim lokalnim zajednicama uspostavi multidisciplinarni pristup radu čiji je cilj preventivno djelovanje na suzbijanju svih vidova nasilja u porodici, pružanja adekvatne stručne pomoći žrtvama nasilja u porodici i nasilnim osobama. Analiza situacije u pojedinim kantonima i općinama ukazuje da se primjenjuju različiti modeli djelovanja pojedinih subjekata. Tako je u jednom broju kantona potpisan Protokol o međusobnoj saradnji institucija iz oblasti zdravstva, obrazovanja, sigurnosti, socijalne zaštite i pravosuđa u pružanju stručne pomoći žrtvama nasilja u porodici (npr. Kanton Sarajevo, Hercegovačko-neretvanski kanton), dok se ta aktivnost odvija još u nekim kantonima kao što je Tuzlanski kanton, Zeničko-dobojski kanton i Unsko-sanski kanton. Značajno je istaći da je jedan broj lokalnih zajednica spreman podržati rad nevladinih organizacija u njihovim aktivnostima na sprečavanju nasilja u porodici, kao npr. Općina Zenica sa kojom Udruženje građana „Medica” Zenica ima potpisan Protokol o međusobnoj saradnji.

U okviru aktivnosti na uspostavi jedinstvenog multidisciplinarnog pristupa posebna pažnja se posvećuje osiguranju finansijskih sredstava od domaćih organa vlasti za potrebe adekvatne zaštite žrtava nasilja u porodici. Napominje se da je u postupku i donošenje novog Zakona o zaštiti od nasilja u porodici (Nacrt prihvaćen u Parlamentu Federacije Bosne i Hercegovine) koji predviđa da se podzakonskim aktima utvrde izvori finansiranja i zaštita žrtava nasilja u porodici.

U okviru ovih aktivnosti potrebno je istaći aktiviranje „Sigurne ženske mreže” koja ima za cilj da koordinira aktivnosti nevladinih organizacija na području čitave Bosne i Hercegovine u suzbijanju pojava nasilja u porodici. U tom smislu „Fondacija lokalne demokratije” Sarajevo i Udruženje „Žene ženama” Sarajevo održale su sastanke u općinama Milići i Tuzla.

Kad je riječ o organiziranju okruglih stolova radi prezentiranja rezultata dobrih praksi saradnje svih subjekata u procesu prevencije i zaštite od nasilja u porodici, za koju aktivnost je Strateškim planom određen veći broj nosilaca, a realizacija aktivnosti utvrđena kontinuirano,

koristimo priliku da istaknemo da je u periodu obuhvaćenom ovim izvještajem organiziran veći broj okruglih stolova, među kojima je već spomenuti Okrugli sto o temi "Duševne bolesti u porodici" koji je organizirala nevladina organizacija "Caritas" Mostar pod pokroviteljstvom Ministarstva zdravstva, rada i socijalne politike Hercegovačko-neretvanskog kantona, zatim okrugli sto o temi "Prevenција nasilja u porodici na području Tuzlanskog kantona" u organizaciji Udruženja građana "Vive Žene" Tuzla, te javna tribina o temi "Nasilje u porodici kao uzrok trgovine ljudima" u organizaciji Udruženja "Žena BiH" Mostar. Također je urađeno „Istraživanje o zdravstveno rizičnom ponašanju djece u ustanovama kolektivnog smještaja, SOS porodicama i đaćkim domovima djece bez roditeljskog staranja" u kojem su sarađivali Zavod za javno zdravstvo Federacije Bosne i Hercegovine, UNICEF i „SOS Kinderdorf", Dječije selo mira, te socijalno-pedagoška zajednica i dječiji domovi u Federaciji Bosne i Hercegovine.

2.4. Aktivnosti na promociji nenasilnog ponašanja i aktivnosti na izradi jedinstvene baze podataka o žrtvama nasilja u porodici i nasilnim osobama

U izvještajnom periodu veliki broj subjekata poduzeo je niz različitih aktivnosti (promocija određenih materijala, spotova, distribucija edukativnog promotivnog materijala, održane televizijske i radioemisije, izdavanje brošura, održavanje radionica s profesionalcima, s djecom, roditeljima, i dr.) čiji je cilj bio promocija nenasilnog ponašanja. Potrebno je posebno istaći uspostavu jedinstvenog SOS telefona (broj 1265) za područje Federacije Bosne i Hercegovine putem kojeg žrtve nasilja mogu dobiti odgovarajuću pomoć. U okviru promocije ovog SOS telefona, Gender Centar Federacije Bosne i Hercegovine je izradio i dostavio svim radio i TV stanicama na području Federacije Bosne i Hercegovine spotove koji sadrže osnovna obavještenja o dobivanju potrebne pomoći za žrtve nasilja. Važno je istaći da su sredstva informiranja prihvatila da besplatno objavljuju ove spotove i tako daju svoj doprinos u borbi protiv nasilničkog ponašanja. U prvih šest mjeseci pomoć putem ovog telefona zatražila je 801 osoba.

U cilju pripreme za izradu jedinstvene baze podataka o žrtvama nasilja u porodici i nasilnim osobama, Gender Centar Federacije Bosne i Hercegovine je obavio određene pripreme odnosno konsultacije s Federalnim zavodom za statistiku i drugim relevantnim subjektima na području Federacije Bosne i Hercegovine, i na osnovu njih pripremio projekat pod nazivom „Podrška uspostavi jedinstvene baze podataka o počiniocima nasilja u porodici i o žrtvama nasilja u porodici" kojim je aplicirano UN Trust Fundu. Na ovaj globalni projektni poziv UN Trust Fundu je aplicirano sa 1643 projektna prijedloga. Međutim, obaviješteni smo da projektni prijedlog „Podrške uspostavi jedinstvene baze podataka o počiniocima nasilja u porodici i o žrtvama nasilja u porodici" nije ušao u uži izbor projekata koji će biti finansirani. Stoga će Gender Centar Federacije Bosne i Hercegovine pokušati na drugi način osigurati sredstva za provođenje ovog projekta.

2.5. Ostale aktivnosti

Iz dostavljenih izvještaja o realizaciji pojedinih aktivnosti utvrđenih Strateškim planom uočeno je da su sve nevladine organizacije (šest nevladinih organizacija) koje u svom sastavu imaju i sigurne kuće, uložile i dodatne napore u traženju i osiguranju sredstava od međunarodnih donatora za pravovremeno pružanje pomoći žrtvama nasilja u porodici. Također se napominje da su u okviru Budžeta Federalnog ministarstva rada i socijalne politike za 2009. godinu predložena sredstva u iznosu od 200.000,00 KM za provođenje Zakona o zaštiti od nasilja u porodici. U 2008. godini je isti iznos sredstava dostavljen nevladinim organizacijama koje u svom sastavu imaju sigurne kuće (raspoređen prema programima tih nevladinih organizacija) s ciljem poboljšanja položaja žrtava nasilja u porodici smještenim u sigurnim kućama. Gender

Centar Federacije Bosne i Hercegovine je takvu inicijativu uputio Federalnom ministarstvu rada i socijalne politike i ove godine, ali ta sredstva još nisu raspoređena.

Nevladina organizacija „Medica” Zenica aktivno sudjeluje u projektu „Rodno odgovorno budžetiranje za sigurna skloništa u Bosni i Hercegovini” skupa sa još devet nevladinih organizacija, a koji za cilj ima osigurati sistemsko finansiranje sigurnih kuća u cijeloj Bosni i Hercegovini sredstvima iz javnih budžeta na svim nivoima u Bosni i Hercegovini. Ova nevladina organizacija će u drugoj polovini 2009. godine implementirati projekt „Uloga muškaraca u prevenciji nasilja nad ženama i djecom”, koji je odobren od UNIFEM-a.

Udruženje „Fondacija lokalne demokratije” Sarajevo je implementiralo projekte „Pomoć ženama žrtvama nasilja u porodici i trgovine ljudima” čiji je donator UNHCR, i projekat „Jačanje kapaciteta profesionalaca za primjenu državne strategije za zaštitu djece od nasilja, zlostavljanja i zanemarivanja” čiji je donator Evropska unija, te projekat „Implementacija programa rada Koordinacionog tijela u prevenciji, zaštiti i borbi protiv nasilja u porodici u Kantonu Sarajevo”, a od ranije se implementiraju i projekti „Snaga je u tebi” (od 2000. godine) i „Ti to možeš” (od 2002. godine).

Zahvaljujući preporukama-molbama zavodima za zapošljavanje Hercegovačko-neretvanskog i Zapadnohercegovačkog kantona koje je uputila nevladina organizacija „Žena BiH” Mostar, privremeno je zaposlen jedan broj osoba žrtava nasilja koje su bile korisnice sigurne kuće.

U cilju ekonomskog osnaživanja žena, nevladina organizacija „Prihvatište za žene i djecu u nevolji, „MIRJAM” i Porodično savjetovalište u okviru „Caritasa” Mostar je provela projekat razvoja pčelarstva za sedam nezaposlenih žena, od kojih su odabrane četiri žene samohrane majke i tri žene čiji su muževi oboljeli od PTSP-a, sa ukupno dvadeset i petoro djece. Također, u vezi s ekonomskim osnaživanjem žena i djevojaka sa područja općine Zenica, Udruženje građana „Medica” Zenica ima potpisan Protokol o saradnji sa Javnom ustanovom „Služba za zapošljavanje Zeničko-dobojskog kantona – Biro rada Zenica”, a ova nevladina organizacija također implementira projekat „Ekonomsko osnaživanje i psihosocijalna edukacija” za žene i djevojke u zeničkim mjesnim zajednicama Arnauti i Briznik. „Medica” Zenica je potpisala i Protokol o saradnji na unapređivanju efikasnije ekonomske i psihosocijalne podrške ženama i djevojkama na području općine Zenica.

U cilju senzibilizacije i edukacije javnosti o problemu nasilja u porodici kroz medije, Preduzeće za filmsku djelatnost, proizvodnju i distribuciju „Mebius film” realizirat će dokumentarnu seriju pod nazivom „JAVNA ISTRAGA”. Osnovni cilj ove dokumentarne serije je upoznavanje šire javnosti s problemom nasilja u porodici uključujući i preventivno djelovanje na suzbijanju svih oblika nasilja, kao i pružanje potrebnih informacija žrtvama nasilja u porodici.